



Inatsisartuni ilaasortaq Bendt B. Kristiansen
Inuit Ataqatigiit
/ Maani

Immap assiliorneq pillugu § 37 naapertorlugu apeqquteqaammut 2017-197-mut akissut

04-09-2017
Sags nr.: 2017 - 17993
Dok. nr. 22753330

Asasara Bendt,

apeqqutinnut, Inatsisartut suleriaasianni § 37 naapertorlugu nassiussannut qujanaq. Apeqqutit matuma kinguliani ataasiakkaarlugit akissuteqarfigineqarput.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Siullermik erseqqissaatigissavara, ullumikkut Kalaallit Nunaata imartaata assinginik peqareemat. Isumaqatigiissut immap assingisa nutarterneqarnissaannut tunngasuuvoq.

1. Nunatta imartaata nutaamik assiliorneqarnissaa pillugu qallunaat naalakkersuisuinut isumaqatigiissut qanoq imaqarpa?

Geodata pillugu suleqatigiinnissamut isumaqatigiissummi 2009-meersumi nunap sananeqaataasa immikkoortui pillugit Danmarkip aamma Kalaallit Nunaata akornanni suleqatigiinnissamut sinaakkutissai aalajangersarneqarput. Kalaallit Nunaanni immap assinginik nutartikkanik suliaqarnermi suliat siumut ingerlanneqarnerisa annertusisarneqarnissaat isumaqatigiissummi anguniakkat ilagaat. Kalaallit Nunaata kitaata kujataani kingusinnerpaamik 2018-ip naanerani immap assinginik piareersimasooqassasoq digitaliseeriisoqarsimassarlu isumaqatigiissummi ilanngussat ilaanni allassimavoq.

2. Nunatta imartaata nutaamik assiliorneqarnerani sulineq sumut killippa, qaqugulu naammassineqarsinnaanera naatsorsuutigineqarpa?

Immap assiliorneq marlunnik immikkoortortaqarpoq: Ilaatigut uuttortaaneq, imartami immikkoortuni immap assiliorneqareersimasuni pitsaassutsimik qulakkeerinissamik siunertaqartoq aammalu sumiiffinnik nutaanik uuttortaaneq. Geodatamut Aqutsisoqarfik ilisimatitsivoq, uuttortaannermi suliat pilersaarutit malillugit ingerlasut, taakkulu kinguaattoornernit taaneqartunit eqqorneqanngitsut. Ilaatigut immap assinginik nutaanik suliaqarnerpiaq maanna kinguaattoorfusoq. Geodatamut Aqutsisoqarfik sulisussanik pisariaqartinneqartunik atorfinitsitsimalerpoq, aammalu Aqutsisoqarfiup naatsorsuutigaa 2020-mi immikkut piginnaanillit pisariaqartinneqartut naammatsinneqarsimassasut, tamatumalu kingorna immap assiliorneq sukkanerusumik ingerlasinnaalissasoq. Geodatamut Aqutsisoqarfiup suli immap assingisa, isumaqatigiissummi 2009-meersumi pineqartut qaqugumut naammassineqarnissaat naatsorsuutigineqarsinnaanersoq ullulersinnaanngikkallarparaa.

Geodatamut Aqutsisoqarfik ilisimatitsivoq, immap assinginit nutaanit 73-iusunit, Kalaallit Nunaata kitaata kujataata imartaanut immap assinginik digitaliseeriinissamut sanaartornissamullu isumaqatigiissummut ilaasunit 32-it saqqummersinneqareersut.

3. Nunatta imartaata assilioqqinnerani imaatigut angalasut atortorissaarutit sumiissusersiutit atortillugit nunap qaatigut ingerlalersinnaasarnerat pinngittoorneqarsinnaalissava?

Immap assingini pisoqaanerusuni sumiiffiit GPS-imut atortut malillugit sumiiffilersugaanngillat, atortulli analogiusut atorlugit suliaallutik. Taamaattumik immap assingi pisoqaanerusut qaammataasat nutaaliaasut tunngavigalugit teknologimik digitaliusumik peqanngillat, taamaattumillu sumiiffinnut eqqortunut immallu assingisa titartagartaanni, assersuutigalugu GPS-ikkut imaluunniit GLONASS-ikkut qaammataasanut paasissutissanut naleqqussakkani eqqortumik sumiissusersinissamut iluarsisaanatik.

Immap assinginik, GPS-ikkut paasissutissanut iluarsisat aammalu nunani tamalaani pitsaassutsimut naleqqussarneqarlutik allanngortinneqartut suliarineqarnerini, immap assingi ataatsimut isigalugit eqqortunngussapput, qaammataasaniillu paasissutissanut naleqqutilissallutik. Taamaattorli qulakkiivillugu oqaatigisinnaanngilara, tamanna tunngavigalugu siunissami GPS-imut kortplotterit sumiiffippiamut kukkusumik imaluunniit eqqunngitsumik takutitsinnaajunnaassanersut. Søkortplotterit immallu assinginit tunisassiat nalinginnaasumik atorneqartut niuerneramik tunngaveqarluni tunisassiaapput, sumiissusersionermut atugassatut akuerisaanngitsut akuersissutigineqarsimanngitsulluunniit. Suliffeqarfiit niuerneramik tunngaveqarlutik kortplotteriliortartut immap assinginik pisoqaanerusunik iluarsineqanngitsunillu imaluunniit immap assinginik maannamut pioreersunik aammalu nutartigaallutik takkuttussanik atuissanerlutik namminneerlutik aalajangerlussavaat.

4. Kinguaattoorneq nunatsinni imaatigut angalasunut qanoq sunniuteqassua?

Kinguaattoornerup kingunerisaanik imaatigut angalasut suli immap assinginik nutaanik ineriartortitsinerup naammassineqarnissaata tungaanut pioreersunik atuissapput.

5. Nunatta imartaata assiliornera nunatsinnit nammineq akisussaaffigineqarsinnaasutut Naalackersuisut nalilerpaat? Taamaassimappat nunatsinni nammineq isumagisinnaalernissaanut qanoq pilersaaruteqartoqarpa, soorlu immaq Asiaq-mut akisussaaffik inissinneqarsinnaavoq?

Immap assiliorneq teknikkikkut immikkut piginnaasaqarnissamik atortoqarnissamillu, aammalu imarsionermut isumaqatigiissutinut attuumassutilinnut ilisimasaqarlunissamik pisariaqartitsiviuvoq. Immap assinginik naammaginarumik pitsaassusilinnik sanaartornerup pisariunerata kingunerisaanik tigusinissaq pisariusussaavoq, aningaasartuuteqarnermik pisariaqartitsiviusussaalluni piffissamillu atuiiffiusussaalluni. Tamatuma saniatigut immikkut ilisimasalinnik piginnaanngorsaanissaq soorlu assersuutigalugu Asiaq-mi piffissamik atuingaatsiassaaq. Taamaalluni tamanna immap assiliornerup kinguarneqqinneqarneranik kinguneqassasoq takorloorneqarsinnaavoq.

Maannarpiaq suliassaqarfiit 32-it suli danskit akisussaaffeqarfigaat. Suliassaqarfimmik tigusinissaq suliassaqarfiup misissueqqissaarfigineqareerneratigut Inatsisartunit aalajangerneqartarpoq. Tigusinissap qanoq iliorluni naleqqunnerpaamik tiguneqarsinnaaneranut pilersaaruserneq suliassanut ilaasarpoq.

6. Naalackersuisut danskit naalackersuisuinut nutaamik isumaqatigiissusiornissaq pilersaarutigivaat? Taamaassimappat kinguaattoorneq pillugu qanoq piunasaqateqartoqalersaarpa?

Immap assiliorneranut tunngatillugu suliaqarnermi aamma immakkut navianartorsionermi radio, radio nalunaarasuaat aamma radio isumannaallisaat pillugit nalorninermut tunngatillugu akunnattoorfiusut assut ajuusaarnartumut pisissimavaatigut Naalackersuisut naammagisimanngisaannut. Ulloq 29. august 2017 qallunaat Nukissiuuteqarnermut, Pilersuinerumut aamma Silap pissusaanut ministeriat

peqatigalugu immap assiliornerata suliarineqarnerani siumut ingerlaneq pillugu qanoq pilersaarnermik nalunaarummik atsiugaqarpunga, isumaqatigiissut ilanngussamik nutarsakkamik ilallugu. Taarsiullugit qanoq iliorfissat ataasiakkaat isumaqatigiissummut attaveqaatit ataatimiitaliani isumaqatigiissutigineqassapput. Suliaqarfiusussat maannamut makku isumaqatigiissutigineqarallarput:

- 1) Geodatastyrelsenip immap assingi pappilianngorlugit saqqummersinneqaqqammersimasut tunngavigalugit immap assingi elektroniskiusut pilersissinnissaat pingaarnertissavai, immap assingi pappilianngorlugit saqqummersinneqaqqammersimasut aamma immap assingi elektroniskiusut imminnut naapertuuttuunissaat qularnaarniarlugu.
- 2) Geodatastyrelsenip Namminersorlutik Oqartussat suleqatigalugit kikkunnut tamanut immap assinginut digitaliusunut kiffartuussivimmik sunngiffimmi umiartortartut atugassaasa pilersinnissaanut piareersaatitut sammisamik aallartitsinissamut toqqammaviusussat qulaajassavai.
- 3) Geodatastyrelsenip Namminersorlutik Oqartussat workshoppeqatigissavai immap immikkoortui pillugit paasissutissatigut attaveqaatit aqqissuunneranni (MSDI) toqqammavineqartut pingaarnertit aammalu MSDI pillugu suliaqarfimmi nunat tamalaat akornanni suliniutaasut ilisimatitsissutiginnissaat siunertarlugu, tassunga ilanngullugu Arktisk MSDI.

Ungasinnersuq eqqarsaatigalugu qanoq pilersaarnermik nalunaarummi isumaqatigiippugut Kitaata kujataanut immap assingi 41-t kingulliit suliarineqarnerat naammassigaluttualerpata Geodatastyrelsenip kalaallit imartaasa sinneri Kitaata kujataata avataaniittut assiliornissai pilersaarusiortugillu aqqissussagai.

Tamanna ilutigalugu ministerip immakut navianartorsiornermi radio, radio nalunaarasuaat aamma radio isumannaallisat pillugit isumaqatigiissuteqarnissamut aningaasat atugassat immikkoortinneqarnissaat nukingisaarneqassasoq neriorsuutigimmagu ministeri ataatsimeeqatigereerlugu suliat aalajaatsumik tunngaveqalersimanerat maanna tatiginerulerpara.

7. Kinguaattoornerup kingunerisaanik nunatta imartaani nutartikkamik nalunaarsorneqarsimangittumi umiartoqassappat ajutoortoqassappalluunniit Qallunaat Naalagaaffia akisussaasuussua?

Immap assingi tamanit atorneqarsinnaasut eqqornissaannut atorneqarsinnaanissaannullu naalagaaffiup akisussaaffeqarneranut apeqqut, pisuni aalajangersimasuni imaatigut angalaneq sumiiffimmi immap assinginik nutaanik atuiffiusumi imaluunniit immap assinginik pisoqaanerusunik atuiffiusumi ingerlanneqarnerasoq apeqqutaangilaq. Pisuni tamani angallammi aquttoq mianersorluni pissutsillu malillugit aqunnissamut pisussaaffeqarpoq, tassungalu ilanngullugu immap assingini paasissutissat pisoqaassusii pitsaassusiilu immap assingisa eqqortuunissaannut isumaqarnerisut eqqumaffigisussaallugu.

Neriuppunga qulaani allaqqasuni apeqqutitit akineqartut.

Inussiarnersumik inuulluaqqusillunga



Erik Jensen